

四庫全書

子部

欽定四庫全書

珊瑚網卷七

明 汪砒玉 撰

法書題跋

宋高宗宸翰

行書詩四首在白宋紙
上後述通鑑數則不錄

入門無平田石路穿細嶺陰風生澗壑古木翳渾井湛
盧誰復見秋水光耿耿鐵花秀巖壁殺氣禁蛙黽幽幽
生公堂左右立頑礪當年或未信異類服精猛胡為百

歲後仙鬼互馳騁
窈然留清詩讀者為悲哽
東軒有佳致雲水麗
千頃熙熙覽生物春意頗
凄冷我來屬無事暖日相與
永喜鵲翻初旦愁鷺蹲
落景坐見漁樵還新月溪上
影悟彼良自怡歸田行可請

高居大士是龍象
草堂大人非熊羆
不逢壞衲乞香飯
唯見白頭垂釣絲
駕鵞終日愛水鏡
菡萏晚風凋舞衣
開徑老禪來煮茗
還尋密竹逕中歸

陳留春色掩思詩
一日搜腸一百迴
燕子初歸風不定

桃花欲動雨頻來，人間多待須微祿。
夢裏相逢記此杯。
白竹扇前客醉舞，煙村渺渺欠高臺。

種竹不必高，搖綠當我楹。
向來三家墅，無此笙簫聲。
皇天有老眼，為閱十月晴。
護我蕭蕭碧，偉事鄰翁驚。
同林偶落此，相向意甚平。
何須俟迷日，可笑世俗情。
明年萬天矯穿地聽雷鳴，
但恨種竹人南山合歸耕。
他時夢中路留眼，
記所更蒼雲屯十里不見陳留城。

思陵楷書付岳武穆手勅真蹟

在帝上

得卿九日奏已擇定十一日起發往黃舒州界聞卿見
苦寒嗽乃能勉為朕行國爾忘身誰如卿者覽卿奏再
三嘉歎無斁以卿素志盪寇常苦諸軍難合今兀朮與
諸頭領盡在廬州接連南侵張俊楊沂中劉錡等共力
攻破其營退却百步之外韓世忠已至濠上出銳師要
其歸路劉光世悉其兵力委李顯忠吳錫張琦等奪回
老小孳蓄若得卿出自舒州與韓世忠張浚等相應可
望如卿素志惟貴神速恐彼已為遁計一失機會徒有

後時之悔江西漕臣至江州與王良存應付錢糧已如
所請委趙伯牛以牛舊嘗守官湖外與一軍相諳委也
春深寒暄不常卿宜慎疾以濟國事付此親札卿須體

悉十九日二更

付岳飛

上用御書之寶
大方印任押

高宗行草洛神賦

書絹上后款
云德壽殿印

花石綱間四海分西湖日日雨芳春孔明二表無人讀

德壽宮中寫洛神 趙巖

胡邦衡劄子

銓伏蒙臺慈頒賜細肋上樽敢不跪受然顏有覲矣朝夕奉詣硯廬以謝伏幸台照 右謹具呈宮使中書舍人台座正月日左奉議郎賜紫魚袋胡銓劄子

盧陵蕭楚子荆建炎中自號三顧隱客胡銓邦衡師事之以春秋登甲科歸拜牀下告之曰學者非但拾一第身可殺不可辱勿禍吾春秋乃佳既卒銓志其墓門人謚曰清節先生所著有春秋辨子荆不甚著故記於胡公札後崇禎元年立冬日 陳繼儒記

忠簡公翰墨甚佳阜陵常問公曰卿寫字宛如卿為人公答曰臣幼習顏真卿字今自成一家又曰朕前日侍太上於德壽宮閣上治疊書畫因得卿紹興戊午所上封書真本太上與朕玩味久之喜卿辭意精切筆法老成英風義氣凜然飛動太上自藏之曰可為後代式但其後為秦檜之所批抹汙者朕啓太上令工遂行裁去裝楷公封事藁有周益公楊誠齋二公題跋在後公孫搢廣西僉憲刻於融州真仙巖此

金定四庫全書
卷七
一段佳話補眉公未盡云 委宛洞天有芒氏名玉
者識於碧月珪几

韓忠武王二詞遺蹟

冬日青山瀟灑靜春來山暖花濃少年衰老與花同世
間名利客富貴與貧窮 榮華不是長生藥清閒不是
死門風勸君識取主人公丹方只一味盡在不言中

右調臨江仙

人有幾何般富貴榮華總是閒自古英雄都是夢為官

實玉妻孥宿業纏 年事已衰殘鬢髮蒼蒼骨髓乾不
道山林多好處只恐癡迷不了然 右南鄉子 世忠

張樞相方少翁詞翰

無利無名無榮無辱無煩無惱夜燈前獨歌獨酌獨吟
獨笑況值羣山初雪滿又明月交光好假便饒百歲擬
如何從他老 知富貴誰能保知功業何時了算簞瓢
金玉所爭多少一瞬光陰何足道但思行樂常不早待
春來攜酒殢東風眠芳草 右滿江紅 果卿張昇

生逢垂拱不識干戈免田隴士林書圃終年庸非天寵
才初闡茸老去支離何用浩然歸美似黃雀秋風相送
塵事塞翁心浮世莊生夢漾舟遙指烟波羣山森動
神閒意聳回首利鞬名鞚此情誰共問幾許淋浪春甕
右黃鶴引 方勺勺著泊宅編者

汪龍溪手札

去年得血疾半年有餘今春誤食胡桃能下血則知胡
桃當忌也 汪藻彥章 順理行將去隨天分付來

又書

陳簡齋詩蹟

耿耿虛堂一榻秋
人間高枕幾王侯
亂雲未放曉山出
片月不隨寒水流
檢校一身渾是嬾
平章千古得無愁
湘波見說清人骨
恨不移家阿那州
山居

水堂長日靜鷗沙
便覺京塵隔鬢華
夢裏不知涼是雨
捲簾微濕在荷花
雨過

妾家長千里
春慵晏未起
花香襲夢回
略事梳洗粧
臺罷闌鏡
盛色照江水
郎帆十幅輕
渾不聞櫓聲
曲岸

轉掀蓬一見兮目成羞聞媒致辭心許郎深情一牀兩
年少相看悔不早酒歡娛藏閨園嬉索鬪草含笑盟春
風同心以偕老郎行有程期郎知妾未知鷁首生羽翼
蛾眉無光輝寄來紙上字不盡心中事問遍相逢人不
如自見真心苦淚更苦滴爛閨中土寄語里中兒莫作
商人婦長干行

風雨吳江冷雲天故國賒扶頭呼白酒揩眼認黃花客
夢蛩聲歇邊心雁字斜明年又何處高樹莫啼鴉 九

日家中 去非

史稱簡齋河目海口大耳聳峙其出處氣節翰墨文章為中興大臣之冠蓋匪直詩名出后山之右已耳雨舟寶峴樓蓄名賢遺墨甚富此固其中乙品云元嗣漢齡其永寶之 嘉靖二十七年中秋日石川張衆偕岳子漳餘鑒賞于橫山堂距兩舟仙逝忽九易春秋矣撫卷悵然者久之 石川

陸放翁草書大聖樂詞

電轉雷驚自嘆浮生四十二年試思量往事虛無似夢
悲歡萬狀合散如烟苦海無邊愛河無底流浪看成百
漏舷何人解問無常火裏鐵打身堅須臾便是華顛
好收拾形骸歸自然又何須著意求田問舍生須官達
死要名傳壽夭窮通是非榮辱此事由來都在天從今
去任東西南北做个飛仙游

陸務觀書長相思詞五首

雲千重水千重身在千重雲水中月明收釣筒頭未

童耳未聾得酒猶能雙臉紅一尊誰與同

橋如虹水如空一葉飄然烟雨中天教稱放翁
側船

篷使江風蟹舍參差漁市東到時聞暮鐘

悟浮生厭浮名回視千鍾一髮輕從今心太平
愛松

聲愛泉聲寫向孤桐誰解聽空江秋月明

面蒼然鬢皤然滿腹詩書不值錢官閒常晝眠
晝凌

煙上甘泉自古功名屬少年知心惟杜鵑

暮山青暮霞明夢筆橋邊艇子橫蘋風吹酒醒
看潮

生看潮平小住西陵莫校程尊絲初可烹 淳祐戊申
八月下浣笠澤陸游書

放翁手簡二通真蹟行草在楮上

游頓首拜仲信學士老友兄即日秋氣寢清伏惟尊候
神相萬福兒子婚事甚荷留念初正以吾輩氣類故敢
有請已令媒氏具道其詳尚何疑哉今又蒙垂誨已抵
龜而決矣餘令媒氏稟日自此遂忝瓜葛何幸如之羸
恭控叙草草不宣 游頓首拜仲信即省元學士友兄

游頓首間濶頃叩甚至忽奉手帖欣重秋雨尊候輕安
外禪師遺墨甚妙恨見之晚輒題數行不足稱發颺之
意皇恐得暇見過不宣游奉簡明遠老友 文字共四
軸又五冊納去五派圖四軸數日前已就付來人去矣
游

放翁以詩名重天下受知周益公范文穆為中興大
家嘗讀其劍南集愛不忍去手思見其人而不可得
今得觀此二帖恍然如侍左右何其幸哉然放翁在

當時不以書名而道麗若此真所謂人品既高下筆自然不同者也二帖一與仲信議婚一為明遠題卿禪師遺墨放翁到今不為久遠而此三人者皆不可知昔蔡明遠鄱陽一卒爾以魯公之書而傳仲信既與翁結婚而禪師遺墨有見晚之恨則二公要皆非尋常流輩人矣而余皆不知之鄙淺可笑此卷既歸墨林墨林博雅好古而蓄書極富必能考以補余之不迨也嘉靖戊午仲冬廿日後學彭謹題

徽國文公朱夫子手帖

熹頓首拜覆竊聞卜築鍾山以便親養去囂塵而就清
曠使前日之所整游而寄賞者今遂得以為耳目朝夕
之玩竊計雅懷亦非獨為避衰計也甚善甚感所恨未
獲一登新堂少快心目耳蒙諭鄙文此深所不忘者但
向來不度妄欲編輯一二文字至今未就見此整頓秋
冬間恐可錄淨向後稍閒當得具藁求教也所編乃通
鑑綱目十年前草創今夏再修義例方定詳畧可觀亦

恨未得拜呈須異時携歸請數日之間庶可就得失耳
未由承晤伏紙馳情 熹頓首上覆

東三傳以讀春秋事猶可略也據綱目以考通鑑法
不可不備也其始終條理之際而且下問如是極精
微矣凡銘識率因其家子孫門人所述類多掩惡溢
美之辭使富道德而能文章者從而書之則必傳信
於永久以張忠獻公之賢紫陽先生猶有悔況餘人
乎故雖契家不肯假借凜然春秋之意世盍所知懼

哉 延祐改元詔取士一用朱氏學高郵璠京口郭
昇同觀于虎林般若僧房時八月十有四日敬書
正治元年歲在辛酉十月十八日敬觀於寓意齋桐
山蘇希則再拜謹志

右徽國文公考亭夫子手帖一以辭譔墓志一以致
問起居而以編輯通鑑綱目義例得失取正於人皆
不書官職名氏其誨已誨人之意藹然見於言表至
今二三十年後風範猶在目前先生文章事業昭在

簡冊又豈後學窺其涯涘又奚待於稱揚褒美哉今
京口何彥徵得之於其外祖郭昇天錫彥徵寶而藏
之亦庶幾知道者翰林學士士奇楊公復議其後均
得拜觀文公之手澤誦之三復起敬時 永樂庚
子仲春清明後五日臨川吳均端肅書

京口何彥徵氏所藏文公先生墨蹟得觀者以為至
幸而題識之者互相發明殆無餘蘊矣然通鑑一書
上下數千百年則本春秋為萬世公論而於契家事

蹟乃以性命之憂為說而辭之豈耳目所及不及簡冊歟抑彼此所施有不可同者歟大賢君子必有以處之此則學者所當講求也詩曰魚潛在淵或在於渚其斯之謂歟 宣德三年歲次戊申秋八月望日

南郡楊溥識

弘濟

文白

澹菴

文白

此卷手書凡三二書如前所云一書則折簡道問安者京口何彥徵寶藏之以示予於戲先生片紙隻字流傳於世不啻拱壁之難得況此晚年之筆其所言

尤後學所當矜式者耶拜觀之餘謹識歲月于後云
宣德四年歲次己酉夏四月己卯臨江後學金幼
孜謹識

右宋朱夫子晦菴先生手書二通觀其於撰述張魏
公銘誌與他書所載不同不免悔之至其所修通鑑
綱目十年而後成然汲汲尚欲求正於人則知前賢
於為文及著書二事其不敢忽如此後進之士率爾
妄作者觀於此可不少致其謹乎此卷今藏何彥徵

氏間以請予識把玩之餘遂書此於末簡以歸之

關西後裔

白文

楊氏勉仁

白文

宣德四年己酉秋七

月庚午後學楊榮謹識

朱考亭畫寒書卷

卷首有崑山王綸理之篆書

仙洲幾千仞下有雲一谷道人何年來借他結茆屋想
應厭塵網寄此媚幽獨架梁俯清湍開徑玩飛瀑交游
得名勝還往有篇牘杖屨或鼎來共此巖下宿夜燈照
奇語曉策散遊目茗椀共甘寒蘭皋薦清馥至今壁間

字來者必三讀再拜仰高山悵然心神肅我生雖已後
久此寄齋粥孤興屢呻吟羣遊幾追逐十年落塵土尚
幸不遠復新涼有佳期幾日戒征軸宵興出門去急雨
過原陸入谷尚輕埃解裝上銀燭虛空一瞻望遠思翻
感慙袒跣亟躋扳冠巾如膏沐雲泉增舊觀怒響震寒
木深尋得新賞一簣且再覆同來況才彥行酒屢更僕
從容出妙句珠貝爛盈掬往生更疊疊後語非碌碌吾
纓不復洗已失塵萬斛所恨老無奇千毫真浪禿 右

遊畫寒以茂林修竹清流漱湍分韻賦詩得竹字 乾
道七年歲次辛卯月朔後二日新安考亭朱熹書於畫
寒方丈

成化丙午仲夏之望集惟謙年丈廨中積雨新霽出
晦翁手墨見示展讀之二十餘韻亮節清詞一洗塵
俗而筆法尤遒勁端重目所罕覩所惜者其先有元
人跋十八家惟謙尊人貞孝先生惡之悉為屏去猶
存倪元鎮一絕蓋高其品耳雖然世不乏人第以時

無人之見而嚴於取亦足以見貞孝先生之正大真
足以繼晦翁之芳躅矣把玩不忍置因識其末 翰

林編修吳鉞志

觀晦翁書筆勢迅疾曾無意於求工而點畫波磔無
一不合書家矩矱豈所謂動容周旋中禮者耶翁書
自言初學為蔡端明所誚曰余學魯公乃唐忠臣公
所學漢奸相也及考魏武本傳云漢世安平崔瑗與
子實弘農張芝與弟昶並善草書而操亞之則魏武

之善書信不誣矣今此詩帖真有漢魏風骨視唐宋
以下自別何物俗儒將元人題品盡行屏棄豈非藝
林中殺風景者哉展卷再三不勝慨恤 吳下王世

貞題

真西山與王周卿手簡

在粉箋上字
磨滅不能抄

周卿諱德文吾鄉王氏之先也仕宋雖不甚顯然其學
實出於其曾伯祖信伯先生帖中所謂先著作是也故
西山真先生也特與之遊他如魏參政了翁游丞相似

杜丞相範王侍制遂亦嘗薦舉陵陽李侍郎心傳因謂其所交皆天下正人然則此帖豈非其一左證也哉惟願其善藏之 吳寬謹題

西山先生書似草草作諦觀之乃非草草者雖不用晉人筆法而亦不出於法之外豈胸次高故落筆便自不同耶然南渡諸公如魏鶴山李心傳兄弟書亦往往相類豈亦習尚使然耶宋之書法至是又一變矣 王鏊

張樗寮正書金剛般若波羅密經跋

樗寮即之七十八歲喜再逢佛誕以天台教主印講主
所校本敬寫此經遺天竺靈山志覺上人受持讀誦我
願執情不作常觀般若六如覺性永明共悟實相本體
流通利益均及有情時景定四年歲次癸亥

昔吳闕外門有駐節字大可二尺許古雅遒勁極得
大書之體余少時見而愛之先主事都水公曰此張
即之筆也後於一統志和州下載即之特善大書以
是知先君盖有所見云若細書則未之聞也茲偶見此經

大不過指尤俊健不凡乃知樗寮不獨善大書已也
書史要會記樗寮歷陽人歷陽在和州即今含山

明隆慶庚午春三月吳下陳鏊識

弟子項元汴焚香捧持於天籟閣萬歷二年孟秋朔
得於吳趨陸氏

又一本

寶祐元年七月十八日張即之奉為顯妣楚國夫人韓
氏五九娘子遠忌以天台教僧宗印所校本親寫此經

施僧看轉以資冥福卽之謹題時年六十八歲

此本為項子長憲副所藏與子京本紙墨筆法不爽毫髮
越衡邑界瞰香人識於修幻齋

張叔夏過韓平原慶樂園賦高陽臺詞蹟

古木迷鴉虛堂起燕歡遊轉眼驚心南園東窻酸風掃
盡芳塵鬢貂飛入平原草最可憐渾是秋陰夜沉沉不
信歸魂不到花深吹簫踏葉幽徑去任船依斷石袖裏
寒雲老桂懸香珊瑚碎擊無聲故園已是愁如許撫殘

碑又却傷今更闕情秋水人家斜照西林

宋丞相文信公劄子

小行草真蹟
在紙上橫卷

天祥皇恐頓首言西行侍讀尚書宏齋先生之生前天
祥在瑞陽時嘗以一介人往候先生盤所先生錫之書
教之以聖賢向上之學若天祥者雖非其人先生不鄙
夷之蓋亦竊自啓發而不敢自為暴棄者也出林之日
長學問之功深味前輩此語疑事事妨吾學郡未一考
被召除郎即丐香火以歸不從反得鄉節辭又不獲請

不得已任事往時臯司所職者才刑獄一項持去楮新
有秤提又適值寇氛不靖添此一事而任大責重矣天
祥以楮為本職第一事日相磨切利病詳悉開諭百姓
惟恐拂戾大槩只以血忱至公風動境內未嘗專事刑
威楮功之所以垂成也賴寇猖獗血江閩廣三路千數
里於此天祥白手用兵丁萬人聲罪致討首尾三月寇
難以平未幾天祥以先人本生母之喪即解印歸里里
之羣不逞倡為一議喧動京師天祥遂因秤提得威虐

之劾未幾又謗天祥討補之敗又謗天祥隱匿重服又裝點牆壁數其貪私不直一錢然後知鄉評之甚難而父母之國不可以行政也昔者吾宏齋先生蓋嘗為鄉漕矣其所以能鎮服一路者蓋出於宿德重望若天祥小生乍出其以召罵賈禍也固宜往議論瀕洞之初縉紳之號為知己者亦皆為紛紛所動不復見察訛以傳訛宜其成閔特先生當其時適在綠野凡天祥一時所行事先生得之間閭耳目之近果如人言之泰甚乎噫

任事之難尚矣真實體國以政事自見乃語之生事謂之妄作而虛虛徐徐相招祿仕百事廢弛一切不問反竊愛根本卹人心之美名曾不思根本在楮人心在物價無財用何以聚人無政事何以立國奈何其是非顛倒之甚耶先生忠忱愛國者也憤世疾邪者也區區肺肝安得從先生一日傾倒求一語以自信茲者伏聞先生以新天子蒲輪束帛之勤為時一出自大司寇進長六卿典事樞顙政柄使漸知公之爵之德之齒千有餘

歲之下煥然重光僕何幸身親見之天祥謹頓首為國
賀為世道賀不特為先生賀也天祥謗毀之餘賴君相
保全無大督過束禮書入深林溫理故讀為吾所為自
是浩然方外之想矣先生即日膏澤六合僕也蓑笠太
平與受公賜臨書馳仰神爽越飛伏乞臺照右謹具申
正月日承心制文天祥劄子

右宋丞相文信公劄子一幅蓋賀包公宏父遷官時
書也其中言在瑞陽時嘗遣一介人往候先生者蓋

公為戶部郎官上疏論董宋臣之惡不報束裝將出
闕時相遣人謂其不可差知瑞州故公在瑞州與宏
父通問也其曰郡未一考被召除郎即丐香火以歸
不從反得鄉節者蓋公以癸亥為瑞州甲子十月召
赴行在除禮部郎十一月除江西提刑也其曰以先
人本生母之喪解印歸里者蓋公甲子為提刑乙丑
伯祖母梁夫人歿實公尊府本生母也其曰宏齋先
生嘗為鄉漕者蓋宏父嘗知隆興府兼江西轉運也


其曰先生當是時適在綠野者蓋宏父為刑部侍郎知平江府以言事召赴闕辭改知紹興又辭疑是時罷歸正在景定末年公解印時也其曰先生以新天子蒲輪束帛之勤為時一出進長六卿典事樞者蓋度宗初即位召宏父為刑部尚書簽書樞密院事封南城縣侯故公賀以此書也其曰謗毀之餘賴君相保全無大督過東禮書入深林溫理故讀自是浩然方外之想者蓋是時臺臣黃萬石以公不職論罷之

公於是闢文山築居第為山水之游故云然也反覆
觀之其忠正之氣凜然見於言辭之間俛仰慨慕之
餘若將見之況當時親炙之者能不感激發奮也歟
是書今建陽縣尹張君光啓所家藏者蓋光啓之五
世從祖父日中宏父之館甥也倅守興化起兵應丞
相恢復閩廣後抗節以死是書之傳也有自光啓裝
潢以示予留玩累日敬書於後以歸之 宣德六年
秋七月望日後學李時勉拜手敬書

吳有大詩帖

多年書問斷湖海竟悠悠一見心雖滿相看淚忽流
彩烟山色暮碧瀨月痕秋明日登程去鵲鴿河上愁
山中多雨水秋晚正妨農病菜和羹煮新粳帶濕春
擁沙埋廢井墮石折枯松寂寂猿啼晝白雲藏數峯
客行情最苦草草共清樽萬水千山路今朝好出門
鴈聲低度水村深中有人敲月下門滿屋秋風燈欲
暗江山千里故園心右宋吳大有詩四首余愛其有
唐季人風韻試

書一通 壬子七月二十日雲書



珊瑚網卷七

欽定四庫全書

子部

珊瑚網卷八

九

詳校官中書臣沈鳳輝

編修臣程嘉謨覆勘

總校官進士臣朱鈴

校對官檢討臣李鼎元

謄錄監生臣凌和鈞

欽定四庫全書

珊瑚網卷八

明 汪砢玉 撰

法書題跋

趙文敏公摹蘭亭叙

蘭亭修禊帖石本甚多只定武刻全具右軍筆法獨孤
長老見示舊刻肥瘦得中知為正本與子固藏者無異
舟中時時展玩臨之不已惟此紙頗得其意至濟州遇

景遠索去重題 孟頫

蘭亭自褚河南雙鉤以還未有能傳其神者即閣帖間有所摹復是影上捕影文敏公以書家其視右軍自謂能腕不負心故亦步亦趨似不愧優孟叔敖而運筆布形不免露本來面目然吳興此帖猶扇負山猛力竭盡矣真神品也偶於友人明古處見此遂以定武蘭亭易之而篋中寶錄知當為此書奪氣也

延陵吳寬

蘭亭墨蹟永閔昭陵精華盡在定武一刻然屢經摹
勒微以失真典刑僅存耳若他搨不足觀也文敏此
帖奕奕有王謝家子弟風流氣別得一種意外神彩
即起右軍使觀之吾知必嘖嘖首肯 吳門周天球
識

正德元年秋日藏青老人嘉禾毛五雲京口褚勉廬
志愛全觀二年夏望彭城富世觀于清照堂

趙集賢臨蘭亭卷

西涯篆書子昂
親筆于卷首

此卷松雪晚年筆力精神清勁飄逸擬之早年如出二
手古人云筆隨人老斯言也豈欺我哉 成化十六年
庚子六月大熱偶觀此卷揮汗書之 士奇之印

朱文

倣松雪書幾三十年未能入室懊惱懊惱書法必見多
則進得眼入心乃應之於手也 士奇載題

昔人有評孟頫畫不如詩詩不如字者予觀此卷但覺
其爛漫掩映俱入神品蓋未敢以其言為確論云 弘
治戊申臘月十八日蘭亭居士識

趙承旨臨禊帖

在紙上

唐人臨模禊帖非必規規點畫間而意度獨至于昂此卷近之師道題

子昂臨蘭亭帖而師道著題于上可謂二美矣雪澗翁宜善藏之不肖復何言趙孟頫題

余見子昂臨臨河序何翅數百本無一字不咄咄逼真如郢人運斤成風庖丁奏刀批卻導窾因其固然如輪扁老于斲如大馬捶鉤不失毫芒得之心應之

手在夫熟之而已此本經師道子俊鑒定增價十倍
錢唐仇遠跋

永禪師書千文八百本魏公所書當不減此此卷大
德五年為韓定叟書定叟會稽人與公厚善集中有
贈定叟及留別詩可考公以大德三年為江浙儒學
提舉此當是為提舉過會稽時書是歲公四十有七
正中年書也跋者四人韓性字明善定叟諸姪道德
文學元中世鉅儒宇文公諒字子貞元統進士為史

官張伯雨茅山道士句曲外史也三公並有盛名而
祖銘亦禪宗大老所著四會語錄其字石鼎杭州徑
山僧云四明者本奉化人 文璧 弘治甲子七月
廿一日觀於沈潤卿氏之仰止樓 吳郡都穆

趙吳興真草千文

結字難筋骨相承不爾則有斷續之態子昂書法獨步
當世備聚諸體然變態不常或者以形似求之大類優

孟抵掌耳

裘題

卧雲齋

慶梓削錄見者驚猶鬼神非旦夕之功也或者觀其表而不觀其裏則不足以議子昂書矣 浦城楊載題
松雪翁千文平生閱數卷未有如此本精絕直逼永師後之書家恐難追及 嘉靖庚戌歲閏月廿三日觀于至德里之小樓 嘉禾項元汴子京

又四體千文卷

延祐六年十月廿三日為錄事焦彥實書於松雪齋
右文敏趙公四體書千文惜不見司馬子微五體書

道德經較此何如也近代是書為最張雨記

文敏公真草篆隸平日未嘗多寫觀此卷必為焦侯
好事而書惜其九原不復作矣 唐棟敬題

又臨智永千文卷

書法甚難有得於天資有得於學力天資高而學力到
未有不精奧而神化者也趙松雪書筆既流利學亦淵
深觀其書得心應手會意成文楷法深得洛神賦而攬
其標行書詣聖教序而入其室至于草書飽十七帖而

變其形可謂兼有學力天資精奧神化而不可及矣此種千文又非平日率意之書若以鐵門限相並較之雖永師復作不能為高下矣欽哉斯人欽哉斯人 雍虞

集伯生

王孫書法有神機漫說籠鵝繼者稀千字禪家鐵門限何人入室更探奇 楊一清

趙魏國臨張旭京中帖

凡五帖止存此

秋深不審氣力復何如也僕疾瘳何足論河南送物人

近來得京中消息承彼數年不熟憂縣不復可論不委
諸小大如何為活計歲日有京中信使去者當數報委
曲耳 吳興趙孟頫臨張長史京中帖

右趙文敏公所臨張長史京中帖筆法掄縱骨氣深
穩為真蹟無疑且不用本家一筆故可寶也聞公嘗
背臨十三家書取覆視之無毫髮不肖似此公之所
以名世也觀此帖信然 嘉靖九年禊飲日陸深跋

于舟中

國子
祭酒

趙文敏公小楷麻姑壇子仲穆書讀書城南又司

馬溫公勸學三帖卷

水精宮松雪齋道人趙孟頫書後二款趙雍書

今年四月十九日余自華亭過松陵之甫里田舍天氣驟熱因留度夏鄰有張君德常德機賢伯仲伯子多蓄名跡而希會面名跡亦罕以示人幽居默默如潛逃而已乃子元度亦不肯相過招邀數次不過罷勉一來六月十六日旱久而雨一雨決旬茅屋上漏

下濕獨坐惟有悲嘆因寄二君詩曰積雨不為休漂
搖使人愁哀吟四壁靜病卧百蟲秋何人肯相念載
酒一銷憂幸有兩張叟清詩遠見酬余六月末病臂
瘡足痛呻吟幾及旬故云七月四日雨止風靜雲翳
開朗泥潦尚沒足忽叔子來訪元度踵武亦至携榮
祿此卷及其子趙雍遺墨以怡悅老眼濯甕牖之涼
颼臨碧江之激湍相與玩詠不已因自念老景侵尋
親朋淪落殆盡雖近在跬步如張君伯仲父子尚不

得數數晨夕况二趙星宿光芒昭回霄漢夢寐亦所
不覩安得不見其遺蹟而為喜忭哉遂記其後以寫
余之憤憤者焉歲次己酉倪瓚詩後改四句開門
望原野江湖潏潏流誰能載美酒相從以銷憂

以上
字皆

旁
注

趙魏公楷書道德經真跡二卷

延祐三年歲在丙辰廿四五日為進之高士書於松雪
齋卷前白描老子立像

延祐六年夏五月十九日吳興趙孟頫謹製又一卷

余觀趙翰林書法深得晉人之旨故筆端蒼勁精神
煥發悅醒人目辛卯夏日獲觀良久不忍去手因識
其末云 太原王穉登

墨林山人得之仲兄少谿子長手授其值七十金

子昂小楷高上大洞玉經

在宋紙上有三千餘字橫卷

右趙松雪大洞玉經後題云大德九年十月八日書

按元成宗大德九年歲在乙巳公時年五十二歲先

是公被召金書藏經許舉能書者自隨書畢所舉廿餘人皆受賜得官執政將留公入翰苑公力請歸己亥改集賢直學士行江浙等處儒學提舉正其時所書也但其體專學元常與公平時書微有不同而用筆之精轉折之妙則無毫髮少異蓋公于古人書法之佳者無不做學如元魏常侍沈馥所書魏定鼎碑亦常倣之謂其得鍾法可受則其於元常固惓惓矣至其晚年乃專法二王右軍黃庭子敬十三行之外

不雜他人一筆所以深造自得為一代書學之祖也
嘉禾子京項君以重價購得此卷持來求跋遂為書
此然予又嘗見翰林孔目何君元朗所藏一卷乃金
陵王南原舊物字小如粟紙高五寸餘精妙不可言
今已歸之天府不可得而見矣猶幸得見此卷而明
窓靜几時一展玩不惟塵眼為開而冲襟遐抱亦為
之暢適古物日少子京其寶之 萬厯三年四月十
一日茂苑文嘉書于歸來堂

趙書高上大洞玉經 中央黃素老君撰

大元延祐三年歲在丙辰五月望為石唐尊師書 集

賢學士資德大夫趙孟頫

此卷乃趙魏公六十三歲所書至精至妙非言辭贊
美可盡蓋公之字法凡屢變初臨思陵後取則鍾繇
及羲獻末復留意李北海此正所謂學羲獻者也舊
嘗獲見周侍御家侍御既坐貶竄竊意必歸天上不
知復流落人間今得披玩累日抑何幸哉殷卣周彝

而此卷不可得博雅君子尚思謹秘而傳焉金華宗
濂題

昔華陽洞中仙經多楊許二君手書結字畫符之妙
所以為洞天千載秘寶近世吳興趙公子昂書法畢
絕偏善小楷又嘗親授洞訣于茅山劉真人所以書
此其可寶不愧古人矣僕叅學以來忽焉老至得隱
地於臨川華蓋浮邱壇東麓仙人茅公修行故處將
結龕誦經得見此卷猶記是年與趙公同在京師今

廿三春公與劉君各已仙去邈瞻回風俯仰慨然大
洞三境弟子虞集書

至正九年歲在己丑秋八月廿二日拜觀於茗溪之
上 趙雍

趙書金碧古文龍虎妙經

延祐元年七月既望水晶宮道人書

余昔年遊燕市嘗見趙文敏書龍虎經半是行草其
人即携去真贋不暇辨也此卷疑是晚年所書得心

應手非淺學可以彷彿予何幸獲觀于樞李汪長公
家惜歸迫不能手錄此經潛心筆法聊題數語以志
鴻泥之感 萬厯乙未秋杪吳下杜大中書

魏公楷書洛神賦

大德三年十二月二日書與子中 孟頫

子建洛神規倣宋玉神女精麗相埒而劉亮過之或
誣以感甄之事潛夫詩話力辯其非而東阿紀夢形
容巧絕比李長吉前後復自相反何哉余頃見淳熙

秘閣帖王令所草賦止揚輕桂之猗靡而下筆勢飄
逸殆與此賦相頡頏今學士乃楷全文道勁清婉尤
為可愛子中得之以與通甫二君皆早世學士晚年
筆力愈奇二君不及見之矣 辛酉夏至日墻東老
叟題 陸子方

柳誠懸云子敬洛神賦人間合有數本今世所見惟
自嬉至飛十三行耳蔡君謨云子敬放肆豪邁與右
軍差異臨學之家必謹其辨矣趙承旨一手全文好

事者欲考王氏父子之法此其可觀之乎延祐中集
從承旨是集賢翰林嘗出此賦真跡九行見示上有
阜陵題字甚謹又三行別得之云是賈相似道購諸
北方者也計其歲月應是後此書十餘年乃得之耳
蜀郡虞集伯生識于吳郡寓舍芙蓉洲至治二年九
月十五日

篆隸變真草興義獻獨擅厥長時去浸遠真跡間見
今世所傳惟石刻耳而石刻又不能得其初模者如

洛神賦文字翰墨卓為二美復無完本昔曾子固記
墨池謂羲之之書晚乃善則其所能蓋亦以積力自
致非天成然後世未有能及者今觀趙公子昂所書
是賦全篇疊疊逼真與他本絕異非蚤歲晚年可比
通甫子中余皆及識之子昂固以能書著大名于當
世不假贊美二賢蚤記玉樓矣承旨公亦既云亡欲
求一字已不可得况若此賦哉通甫子仲長出以示
余感慨久之仲長宜什襲珍收慎毋輕出至治癸亥

立夏日書

鳴鳳

李氏
時可

周越法書苑王獻之字子敬羲之第七子官至中書
令正書入神品洛神賦小楷烏絲欄寫成精密淵巧
出于神智後有柳公權跋尾云子敬好寫洛神賦人
間合有數本此其一焉寶歷元年正月二十四日起
居即柳公權記亦楷題又柳璨題云天祐元年五月
六日堂姪孫中書侍郎同中書門下平章事判戶部
璨續題子敬帖後越觀歐柳筆法全出此書也又載

子敬初為謝安長史太元中起太極殿安欲使獻之
題榜以為萬代之寶而難之乃說韋仲將題凌雲臺
之事獻之知其旨乃正色曰仲將魏之大臣寧有此
事使其若此知魏德之下衰矣安遂不之逼又李嗣
真論書體樂毅論太師箴體皆真正有忠臣烈女之
像告誓文曹娥碑其容慘悴有孝子順孫之象逍遙
篇孤雁賦迹遠趣高有拔俗抱素之象畫像贊洛神
賦姿儀雅麗有矜莊嚴肅之象所謂見義以成字成

字以得意非獨研精措理實根於教化矣 至治三
年七月廿五日寓齋錄記 袁仲長

泰定丙寅七月既望龔璠觀於吳中之寓舍於是昂
翁之沒五年矣擬之于今此則人琴未遂俱亡者仲
長寶之

洛神賦嘗屢書之世傳十三行者以其所見入石非
可遂以為據也柳誠懸謂人間合有數本則固不止
是豈他本誠懸亦未之見耶此松雪老人所書全篇

雖自用其體然應規合矩抑可謂善學大令者歟今
人觸目質本一見便疑其非不知其中固有不可以
偽為者矣非仲長蓋未足以語此 東陽柳貫識

余家所藏舊刻洛神賦累朝名人題識于後者今附
錄於此 普通三年正月徐僧權 湯法象 滿騫

姚察 丁道矜 唐懷充 中書侍郎禮部尚書

平章事集賢殿大學士崔所

天嘉二年十月廿三日中書舍人朱异 姚懷珍

開元十八年三月廿七日參軍事學士諸葛頴 釋

智果 咨議參軍開府學士柳頌言

均 宋丙子
歲正月

十六
日

至正二十五年乙巳四月十二日袁泰記 仲長

趙公用意楷法窮極精密故其出而為行草縱橫曲
折無不妙契古人不善學者下筆輒務為傾側之勢
而未嘗窺其用意處是以愈工而愈不及也此賦筆
法尤森嚴學書家宜守為律令仲長尚寶藏之泰定

金史口月八日
元年六月八日金華黃潛書

子建之賦洛神麗矣然其於則遠焉子敬喜書之而
子固亦喜書之豈其才情氣習有所相類者歟十三
行真蹟不可復見一刻本翩翩逸氣猶能動人此全
文固書中之佳者然細觀之殆少異焉若以越中韻
士與河朔少年馳逐耳知書法者當能辨之天全翁
為石田高尚書

又書洛神賦卷

魏國趙文敏公書此洛神賦當是大德之時後之學書者能闢其藩籬者蓋亦鮮矣况堂奧哉君羽其實之後學危素燕城清淨軒題

又晚年書洛神賦

公藏大令真蹟凡九行嘗為余手臨之于松雪齋此卷典刑具在居石刻之右句曲外史張天雨觀至順四年閏三月十九日玄文館記

蔡襄云王子敬愛寓洛神賦故世多傳十三行而已余

見陸子順所藏者其筆意峭拔陸得於文敏公且謂文敏晚年楷法之進蓋得此故也或者又謂陸藏十三行其法往往類歐搨今較文敏所藏書此賦誠中年臨本不同賦後所題年月當為公最後之筆故其法度如此

元統二年六月考亭陳方題

子貞

當年子敬洛神賦歐褚臨摹不知數世人惟重十三行真贋難分爭抵牾趙公書法宗二王手寫全篇復前古上追黃庭下樂毅善刻唐臨俱未許殘編斷簡

久脫畧趙璧隋珠獲全睹宓妃下走天吳奔驪龍騰
驤老蛟舞人間欲見不易得往往收藏秘天府江南
故家多好事一紙寧論百金估臨池墨筆畫飛動貫
月虹光夜吞吐願加什襲重珍護却恐雷霆來下取

雲門唐珙

溫如

文敏隸楷之妙俊灑飄逸蓋得於洛神為多此卷尤
見其波瀾老成蓋捐館前二歲所書誠可寶也正
統八年九月十三日秦和楊士奇志

子昂行書歸去來辭

趙文敏書歸去來辭南北所見無慮數十本或真或行
各極精好淵明有道而隱者也其為文辭皆以發其冲
澹幽逸之趣文敏居官達中獨能好之其志亦可尚矣
方之晉人愛寫洛神賦者不賢乎哉此卷尤妙入神正
宜寶之 至正十六年歲在丙申正月廿六日藁城倪

中書于杭城東橋寓舍

外曲江錢惟善楊李鮑恂
浚儀趙淑諸詩皆不錄

趙書勉學賦并序

古人學才學藝而極於達道今人學道之名返流入于
才藝豈道無蹊徑可入耶由生死之念不切耳且學不
至于道徒增情妄於理何益哉余故作此賦以勉其所
謂學云辭曰三界虛廓惟念自縛念去覺存未離有作
真淨體中不容他著大地火聚如何湊泊雖靈鑒之可憑
信此宗而無諾見欲逃于所常理必資乎參學生死事大
意包萬劫之輪迴迷悟報深百界隱三千之醕酢所云
學者不學六藝不學羣書孜孜矻矻惟道是需求願樂

之半偈舍所重之全軀思香花以表其誠敬皈心而罔
及形羸或五熱炙心而投火於必死之隙或半腰積雪
而必臂於忘生之區臨寢食而終不暇顧對寒暑而安
有其餘或降已為童奴或捨身為牀座或半夜腰石而
負舂或七箇蒲團之坐破或視利養如游塵或棄功名
如涕唾或千魔萬難並勵之以精勤或積世多生頓相
忘于怠惰或驚幻影之忽遷或嘆隙陰之易過或形影
相弔於空閒寂寞之廷而不見其焚孤或身世相忘於

苦樂順逆之場而不知其禍福如浮山典葉縣之厨演
祖司白雲之磨楊政總院事而十載奔馳神照問經王
而三周折挫蓋忘情於道注念於學而不暇擇利害較
優劣者也原夫道為舟航道為梯級道為家舍道為飲
食匪舟航無以越生死之迅流匪梯磴無以構湮槃之
高績微家舍何以收漂流暴露之狂蹤微飲食何以濟
饑餒孤虛之陋迹覲面不委噬臍何及法無正像未三
時之等差人何上中下三報之端的惟知進道之弗荒

不擬真切之自積古有跛鼈千里之喻正法末世之談
蓋表其自強不息者也偉矣哉學有多轍悟非一岐子
韶聞月下之蛙圓悟聽日中之雞為嶠撥火洞山渡溪
見桃花而更不疑擊琅玕而忘所知德嶠遇紙燭之滅
會通逢布毛之吹至若聞畫角洗鉢盂細抹將來從遮
裏入是以望影而脫聖凡之羈鎖迎刃而具齧鋌之玄
機人徒見其悟之不難而不知其學之必到苟學力之
不精何悟由之深造道離愛憎其學之心對順逆肯

存于懷抱道非取舍其學之之心遇佛魔必空其闡奧
道體等平其學之之心苟動一意即資其顛倒道或具
足其學之之心苟任馳求轉增其紛鬧道非見聞其學
之之心擬涉解會而以名自暴道非有無其學之之心
苟滯一隅而誠難取效道如倚天長劍其學之之心不
能覲體混融則不免為是非之所籠罩道如果日道如
太虛道如風輪道如火聚其學之之心或不具如是之
天姿縱使讀四庫書禮五千藏吐懸河瀉餅之詞章徒

爾資其叶噪惟道一學最妙最玄既無義路亦匪言傳
昧之則一門異轍了之則萬里同鄢佛祖為一大事而
指鹿為馬學人走遍天下而掘地尋天絕思惟處強生
節目無義味話特地加鞭逼生蛇化活龍粥飯氣高揮
大抹轉山河歸自己小兒戲羣號聚喧據七尺單守三
條椽如遇怨敵如取頂巔學之之力既極悟之之理不
偏理必學而至悟予於是作而為賦今人徒見前輩悟
在頃刻而不思古人於未悟之先其學之心未嘗不專

精而謹懼其學之之心或不至道之洞府曰藝曰才豈
吾徒之當慕嗟師道之既微驚法歲之云暮惟學道之
為學與百家而異路毛髮忽若當情鍼壁那容進步絕
學之學以為學以非悟之悟而為悟不涉功勲豈容迴
互死偷一于象數未形之初具正眼于眛兆不彰之戶
一語臨機萬靈莫措臨濟漫拖雷轟霆震之喝雲門空
成石裂崖崩之句曰向上之不傳總羣機之共赴鞠其
所以自来必玄學而為度或不勉勵其學力未有無因

而自遇大哉能人為學之端視勤苦而無畏對寢食而等觀駕一乘而勇銳憫三月而悲酸垂從範而塵沙不廣闡大猷而虛空靡寬由是四十九年弓折箭盡三三四七唇亡齒寒性天滅後學海枯乾古者謂不學佛法惟務體心蓋體心乃佛法之至學也又謂於已無事切勿妄求蓋無求亦佛法之至學也又謂學道之門別無奇特只要洗滌根塵下無量刻來業識種子蓋淨根塵業識乃佛法之至學也又謂參禪一著要敵生死不是

說了便休蓋精勤勇猛久遠不退亦佛法之至學也又
謂參禪學非等閒宜廢寢以忘飧蓋廢寢忘飧於學之
之頃曾不期然而然也又謂佛法可學無禪道可得無
湏槃可證乃至無無亦無與無俱遣亦不外吾學之之
理也或謂道本具足安用學為本具猶璞石之含玉安
能免參學之斧鑿本具猶腴田之產禾安能免參學之鋤
犁本具猶地中之水脉安能免參學之穿溝本具猶古
鏡之藏光安能免參學之磨治本具猶木中之火焰安

能免參學之錯擊本具猶良醫之治病安能免參學之
擣節本具猶驪頷之夜光安能免參學之探索本具猶
扇中之風性安能免參學之握揮本具猶貧士懷中之
至寶匪參學之指導雖終身而罔知本具猶麥為麩體
黍乃飯基苟不加參學之炊磨任萬劫以難齊一旦力
邁先賢功侔古聖脫參學之幻因提本來之正令挫有
作之鋒銳擲無為之欄柅不加毫力掃生死魔於見知
之稠林靡仗寸金斬湮槃將於證臨之深甯斥臨濟金

剛王使之無地措躬驅德山木上座俾其望風乞命或
智眼之不明豈當情之能競今之學者惟以本具之說
相牽而不思實學真參即究竟原夫釋迦不天生達磨
非自證總由積學之真致此光明之盛者也審如是則
學乎乃破生死斷煩惱證菩提提出三界興保社起叢林
之不可不由之徑也可不勉乎可不勉乎 中峯大和
尚所作勉學賦言言皆實乃學人喫緊用力下工夫之
法門也豈止於老婆心切而已學於此玩誦而有得焉

金匱石室書
卷八
於無奈處豁然開悟則此賦亦為閤室之燭薪迷途之
鄉導矣因以中上人見示於是疾書一過至治元年二
月廿二日弟子吳興趙孟頫記

予舊藏趙魏公雪賦中有破損十餘字余昔在京邸
為弟持去不復返也今觀此勉學賦筆法尤精紙墨
完好此非易得之物敬題于紙尾安所雅文請善珍
之
夢萱下士華

右趙松雪書中峯勉學賦真跡松雪生平深得意於

中峯之道余家所刻停雲帖中松雪手札一十三紙
與中峯者言言皆有道味故嘗書此賦謂閤室之燭
薪迷途之鄉導此卷子曩見在白下徐碧泉處先待
詔欲假刻石最後為一豎子謀去殊為夢想今得復
覽慨悅不勝敬識數語昔胡仲汲謂松雪之書上下
三百年縱橫一萬里不虛耳 隆慶丁卯春三月朔

日 文嘉

趙承旨書光福重建塔記真蹟卷

塔者西域聖人之靈廟衆生滅罪致福之具也自阿育王建初後代震旦之來表刹興盛者莫盛於蕭梁之世焉光福塔者實梁大同權輿唐會昌暴殄復興咸通至趙宋宋至今朝大德中住山礎師時畢方鳥棲其巔以致鐵石瓦甃隳哉有不可葺者住持相師謨畫鼎創真人周靜翁仙宗而尚佛來自雙鳳作檀越主率寺鄰富而信者幼成徐公沙門願而幹者成徹德三公暨寺職班員消吉命匠篋棲鸞竹索以為綯材化羊杉縛以為

架撤頂至踵革古從新即舊基越舊制別繫層級至
五半徐公脫屣索訶相師遷喬梵行施心願力惟靜翁
不移走書告曰山中住持聞有更易倘林屋清師補處
則塔緣幸甚香火幸甚既而䟽來洞庭孤雲乃起一葦
未杭翁已羽化嗚呼元度乎重來乎三嘆終至至末席
溫或謂塔緣幸歟不幸歟余曰佛三祇百刼修六度萬
行以戒定慧力成舍利益衆生者塔之謂也由塔即廟
廟即貌貌佛聖德令衆歸命行檀波羅而得福田今塢

一緣將普萬化是符佛本願益衆生歟果元度之類歟
子知其然而不知其所以然歟於是越明年具梵禮迎
銅像出化東行首翁之兒婦魏氏母子承禎同調無改
大父之道樂助而之任洋沙頭太倉蘇臺瑩見四新稠
載而返尋不請之檀朱公閱工施財施藝特銀其相輪
之頂復有刺血為墨書妙經者二渡長江入長淮募遠
者三大槩廿餘同袍輔勢忘倦宣勞聚諸材鳩諸工一
舉而完七級自尖以還飾蓋至四歲暮収工明年像復

出西募春行夏歸秋作餘層列屋皆其落成輝輝乎摩
尼圓明沓沓乎露盤負晶碧瓦鱗集畫檐翬飛布闌楯
而寶鈴和鳴鎮山川而人天瞻仰具功德一十五種消
罪業八萬四千不夜常光免責備於香火實一不幸而
衆幸且甚也遂書延祐改元二月十日之建始來年五
月望日之畢功系以辭曰阿闍世藏設利羅阿育得之
出恒河八萬四千起塔婆後世則之廣興建四方玲瓏
或八面蕭梁以前世未見我此靈廟實大同起伏二次

三鳩工延祐以來又六冬清寧仙人德相佛福緣慈緣
普澤物白花巖頭櫺岨清也薄有銅像緣兩募一舉
功其圓盡未來際民福田常光歷刼射牛斗羌椅椅兮
淑吾後哿矣富人壽長久至治元年二月望日建皇帝
陛下千萬壽 佛慧雄辨大師本寺住持沙門了清譔
前翰林學士承旨榮祿大夫知制誥兼修國史趙孟
頌書并篆題

右記為松雪翁真跡無疑蓋亦是晚年得意之筆故

其筆蘊風神愈見精絕出塵云

子昂碑板絕似李泰和余所見無慮一十本此卷筆意虛和尤可寶也 董其昌書題於墨花閣

薦福興福二碑俱集右軍書而有神會天成之趣非拘拘刻畫求肖者遠勝懷仁聖教以懷仁嗜奇偏于王跡中擇其峭刻頓挫者聯貫以布之雖于鈎掣映帶極意求其血脉而平和淡宕之致不存矣以故二碑乃千載碑書之模楷下是而歐顏柳褚非拘即縱

若太和益放矣松雪翁此書正用薦福道緊之筆視他本倣太和者大不類也玉冰親翁倍宜珍襲云

崇禎元年春三月古秀李日華題

先荆翁習舉業時即得趙書光福碑記置墨牀筆格間時一展玩也已未春董太史過余舍因觀此卷著數語後李璽卿見之以玄宰衡鑒未確為題云趙松雪書光福重建塔銘結構用薦福興福二碑稍鬆活耳觀者以為倣李太和則失之矣未幾余重罹不憫

君實太翁同珂雪親家來奠款齋頭復見是卷喟然
疏前之未盡焉乃余竟為殯事所需驚諸藏玩并去
趙跡至今猶悵先澤之不存也第卷留汪氏印記為
可驗他年子孫或有購之者未知得合浦珠還否時
值崇禎癸酉秋余獲文敏公翫花美人圖有歲月不
我與之嘆因識所錄碑記後云禾興汪珂玉

趙魏公楷書湖州妙嚴寺碑記

在宋楮紙上橫
卷公自篆卷首

前朝奉大夫大理少卿牟獻謨 中順大夫揚州路泰

州尹兼勸農事趙孟頫書并篆額

德清慈相寺鐘樓下
十王牌位皆公手書

楷精

右湖州妙嚴寺記一通蓋趙文敏書端雅而有雄逸
之氣在其意欲託之金石故不草草湖州公桑梓之
鄉豈昔寺僧與公善而得之然得此自不凡矣靈芝
主僧雨菴得而藏焉又乞予書數語亦豈凡僧也耶
惜予語不能超凡有愧于公之書耳成化戊子十月

七日永寧一客

公朱文
自丹丘
白文

松雪記妙嚴寺中有云妙嚴乃佛心所見之事相也
觀此書端妙嚴重知為松雪心中所見之事相焉又
云幻十八開士於殿中金碧眩耀以此文此字勒堅
珉樹諸殿中其光彩與開士爭光不直眩耀一時而
已靈芝瞻上人得其真蹟可不寶之乎 張震跋

趙公書寺記予昔跋之茲來雨菴又有請焉請之意
蓋欲予志今昔歲月昔為成化戊子十月七日子歸
自永寧今為辛卯十月八日來自丹邱一俯仰間四

見寒暑念人生聚會幾何良可嘆息公書已不待贊
予又未識幸一再閱是月十有二日燈下公綬書于

芝園深處

嘉禾姚氏

丹丘子

棲棲倦
游客

芝園深處余宿之屢矣茲來為成化甲午中秋雨菴
將移住上天竺竺國山前復肯著余行跡也耶雨菴
索余送住上竺詩余歸速弗克就因出是卧軸請再
誌歲月日詩則俟予補書別紙也公綬

趙公書法晉人所以妙絕千古余謬贊公書屢矣前

此筆路猶未入公格範不意老年又復私淑公之書
法固不待贊贊之者無間于往古來今無間于簪紱
韋布則公之書得之于心應之于手通之天下使右
軍復生亦必嘆賞蘭亭裏鮓墓田等帖料容其一著
脚也雨菴以余言為何如 壬寅孟夏五日逸史姚
綬記

趙松雪書中峯懷淨土詩後系讚

讚云淨土偈者中峯和尚之所作也偈凡一百八首按

數珠之一週也憫羣生之迷途道佛境之極樂或驅而納之或誘而進之及其至焉一也弟子趙孟頫欲重宣此義而說偈

三千大千世界中恒沙河數諸衆生一一衆生一一佛
一一唯心一淨土而諸衆生無始來因癡有欲生愛渴
根塵染纏不自覺流轉生死墮惡趣我師中峯大和尚
慈悲憐憫諸衆生勤勤為作百八偈普告恒沙諸有情
如身受病等痛切若人依師所教誨一念念彼阿彌陀

一念已復無已念自然往生安養國阿彌陀佛為接引徑
坐金色蓮花臺池中蓮花如車輪微風吹香徧法界頻
伽並命及鸚鵡白鶴孔雀播妙音黃金界道七寶臺燕
坐受茲勝妙樂諸惡苦趣咸無有悉皆我師之所度實
無衆生師度者惟衆生心淨土故是故我今稽首禮重
讚我師之弘願 延祐三年歲在丙辰六月廿四日大
都咸宜坊寓舍書

趙書春寒詩卷

仲春尚寒氣林花無艷姿
弊裘擁衰疾風雨何淒其
始雷發東隅霽牖陽光披
微風草際動落英池面移
幽禽變圓吭游魚揚四鬐
我病自此愈泛舟溪水湄
小輿指南蓋短筇步東毗
機心不復有高蹈農與義
笠澤茫茫鴈影微玉峯高
下護雲衣長橋寂寞春寒
夜祇有詩人

一舸歸 子昂

二月十九日

珊瑚網卷八

欽定四庫全書

珊瑚網卷九

明 汪砢玉 撰

法書題跋

趙子昂諸賢天冠山題詠

龍口巖 峭石立四壁寒泉飛兩龍人間苦炎熱仙山
已秋風

洗藥池 真人棲隱處洗藥有清池金丹要沐浴玉水

自生肥

鍊丹井 丹成神仙去井冽寒泉食甘美無比倫華池

咽玉液

長廊巖 循巖如長廊下有流泉注山中古仙人步月

自來去

金沙嶺 攀蘿緣石磴步上金沙嶺露下色熒熒月生

光炯炯

昇仙臺 仙臺高幾許時時覆雲氣一去三千年今人

每翹企

逍遙巖

茲巖足逍遙下可坐百人豈徒木石居直與

猿鶴隣

靈湫

靈湫不受污深淺何足計小憩松竹鳴蕭蕭

山雨至

寒月泉

我嘗遊惠山泉味勝牛乳夢想寒月泉携茶

就泉煮

玉簾泉

飛泉如玉簾立下數千尺新月橫簾鉤遙坐

挂空碧

長生池

竹實鳳時至水清魚自行著我草亭裏危坐

學長生

道人巖

道士本避世問之無姓氏如何千載後石室

有人至

雷公巖

雷公起卧龍為國作霖雨飛電掣金蛇其誰

敢予侮

石人峯

巨靈長亘天何時化為石特立千萬年終古

無人識

學堂巖 仙人非癡人 山中猶讀書 嗟我廢學久 聞此

一長吁

老人峰 有石像老人 宛然如繪素 稽首禮南極 蒼蒼

在煙霧

月巖 月巖如偃月 風泉灑晴雪 仙境在人間 莫成

兩奇絕

鳳山 山鷄愛羽毛 飲啄琪樹間 照影寒潭靜 翔集

落花間

仙芝巖

窈窕石室間中有仙人躡說與牧羊兒慎勿

傷吾足

鬼谷巖

鬼谷巖前石唐文字字奇何當拂蒼蘚細讀

老君碑

風洞

石壁何空洞中有風冷然安知列禦寇不向

此中仙

釣臺

仙者非有求坐石視投釣咄哉羊裘翁同名

不同調

磔潭

神龍或潛淵石洞通水府勿遣兒曹劇飛空

作雷雨

聲香巖

山險通鳥道水深有蛟龍誰言仙樂鳴高人

方耳聾

三山石

我有泉石癖甚愛山中居何當從羣公講學

讀吾書

五面石

洞中即仙境洞口是桃源何殊武陵路雞犬

自成邨

小隱巖

林藪未為隱山厓猶可梯終當携家去瑤草

正姜姜

一線天

醺雞舞甕天井蛙居坎底莫作一線看開眼

九萬里

道士祝丹陽示余天冠山圖求賦詩將刻石

山中為作此二十八首延祐二年六月二十四日松

雪道人

小隱巖

山鬼小兒足木精游女神據會學真隱下視

飛花塵

聲香巖 深睡失明珠 猛走飛流涎 松花卷輕雨 滴滴

百重泉

學堂巖 露盤下金薤 雲笈流珠纓 泠泠寒巖下 猶有

嬰兒聲

鬼谷巖 縱橫太古石 短長千歲藤 感彼巖居子 獨飲

古澗水

昇仙臺 寥寥入太清 金門繚紫垣 或云有官府 微誦

五千言

釣臺垂綸落澄潭小魚倏然來大魚引之去釣石

何崔嵬

一線天茲山可容天舉世皆笑之我不答此語鼓腹

支其頤

五面石分一只成五五石各有一誰能據其上面面

不相識

寒月泉曉汲寒泉清明月各在空空不見月引水

復在手

金沙嶺

金沙雖為貴履之傷我足愧彼側布人欲獲

無量福

長生池

飲水人已去山中多白頭青蘋空淺處時見

玉蟾浮

老人峯

高帽側整整秀領沉重重積此太古雪遂名

老人峯

三山石

三山不可度絕壁峙書堂流水日浩浩太極

彌茫茫

磔潭 沉沉無底谷泱泱太古雲赤日焦下土老蛟

眠不聞

玉簾泉 截玉作明簾不知簾外事應有碧眼仙隔簾

見人至

石人峯 飡玉未得法變形成楚囚九轉乞換骨三沐

期點頭

仙足巖 山深猿狖驚瞬息下神步空飛本無蹤長嘯

天上去

月巖

顧兔樂嬉遨入地不得騁化為白玉泉彷徨

返東井

雷公巖

神鈞起空洞陰火生羽翰我耳杳不聞白雲

在天冠

道人巖

道人本無姓對客那有言龍口逆石髓鳥跡

開雲根

丹井

金鼎悶寒泉真人彌不壞年深定飛騰子夜

吐光怪

洗藥池

靈根乘月吐肉芝生土肥濯以上源水千歲

永不饑

鳳山

孤飛千仞岡兩翼化為石年年春風時山花

成五色

風洞

罡風轉空輪浩劫不停息此為天地根視之

杳無跡

逍遙巖

形留非自在何者為逍遙青松在谷口白雲

在山腰

龍口巖

弄月紅玻璃
匿雲紫芙蓉
近矣厭狡獪
納息

玄虛中

長廊巖

飛吟起霞珮
馭氣躡天梯
碧雲布參差
纖修

與巖齊

靈湫

靈龜道其前
游儵殿其後
歲久深自韜
清夜

巖下走

清容居士書

越袁
桐氏

龍口巖

噴薄細成霧
噫嘻忽為風
孰知生死關
在此

呼吸中

洗藥池 隱芝生肥水飛根漱靈泉
沝香到人世飲者

壽萬年

丹井 古丹深藏井晨光發崖谷有能下取之錫以

兩環玉

玉簾泉 神仙不愛寶萬古玉為簾顧遣天風約當明

弄海蟾

長廊巖 細霧不濕衣落月見長影緩引步虛吟盡此

秋衣冷

金沙嶺
昔踏金沙灘
今陟金沙嶺
卿來瑣骨觀
即是
太陽鼎

飛昇臺
絕景斷塵情
寥寥入太清
可須臺百尺
更待
羽翰生

逍遙巖
昔誦逍遙遊
長憶藐姑射
百世待神人
瘦影
落寒石

靈湫
澄空如不測
為谷廓能容
沙石俱成寶
龜魚

總是龍

寒月泉

無盡山下泉普供山中侶各持一瓢來總得

全月去

長生池

竹根飛赤鯉荷葉戲靈龜不道神仙宅長生

別有池

道人巖

斷崖窮鳥道絕頂出秋旻能此高居者誰非

有道人

老人峯

冠顛風披披垂領雲皓皓諸峯羅兒孫獨得

老人號

雷公巖

神物時時出人間皆震驚誰知崖上看才是

小兒聲

月巖

巖圍徑尺雪天墮第二月豈無凌虛人飛行

廣寒闕

仙足巖

失脚落人間一往不復收遂令學者步只循

行迹求

鬼谷巖

開閭雲無定縱衡石作關任渠名鬼谷亦未

離人間

風洞

渾渾復皓皓刁刁仍泠泠空洞幾許如蓄此

無適聲

石人峯

何年餐石髓屹立照清波如此成終古長生

亦為何

學堂巖

翩翩學仙子羣居此山巔定無書可讀姑以

聲相傳

鳳山

聖神千古上風雨九疑空只有山中竹旋為

十二宮

馨香巖潭水下深
黝日星隱文章鼓
雲出石氣洒雨
作龍香

釣臺危石上
崆歌清風百尺垂
故人恐多事莫道
釣翁誰

磔潭未始滿
盈過何曾波浪興
衆皆資善利此獨
保無能

三山石三山可飛
度舟楫不能通
莫執茲峯石摹緣

浪賞功

五面石 一石作五分何者是真面拄杖試敲看莫作

點頭見

小隱巖 深潛避世塵長恐與名親故是絕知者誰言

無隱人

一線天 太空誰是礙峽徑事幽行天體原無外通君

一線明 余賦此詩時以小字書之袁伯長學士禮部

王繼學尚書趙承旨先後同賦雜書同一卷後云失

去復得趙公如前而求書其後偶閱故紙得草藁餘
紙漫錄之 虞伯生甫

龍口巖 飛泉龍口懸平石鰲背展高會瀛洲人一笑
滄海淺

洗藥池 長生底須學神芝何處采不見洗藥人清波
湛然在

丹井 丹井只三尺四時無虧盈餘波飲可仙我亦
願乞靈

玉簾泉 天孫織玉簾懸之千仞石垂垂不復收滴滴
空山碧

長廊巖 誰謂山中險長廊亦晏然花開春雨足月落
山人眠

金沙嶺 峻嶺接仙臺仙人獨往來簫聲吹月落鶴羽
拂雲開

昇仙臺 高臺去天咫有仙從此昇遺迹若可攀山雲
白層層

逍遙巖

老竹空巖裏懸厓飛水前欲識逍遙境試讀

逍遙篇

靈湫

神龍蟠泥沙宅此巖之阻遊人勿輕觸歷歷

聽秋雨

寒月泉

泉清孤月現夜久空山寒不用取烹茗自然

滌塵煩

長生池

修竹夾清池一亭山之西長生人已去誰能

汨其泥

道人巖 道人出白雲空簾為誰碧獨坐誰得知時有
鶴一隻

雷公巖 谷口陰風來山頭暮雲舉但見飛電光山人
賀春雨

老人峯 何年南極星墮地化為石至今明月夜清輝
倚天碧

月巖 飛泉何許來明月此夜滿登高立秋風妙趣
無人款

仙足巖 一足不能行神仙寧此留
祇以形之似高蹤
何處求

鬼谷巖 道散亦已久世變如浮雲
石壁有太古為問
空同君

風洞 清風貯深洞四時長氤氲
飄然無遽發散我
山中雲

石人峯 仙人立危峯欲作凌雲舉
飄然閱浮世獨立
寂無語

學堂巖 仙人讀書處樵子時聞聲猶勝爛柯者只看
碁一枰

鳳山 孤鳳棲山中白雲護清境朝陽早飛來月落
空巖冷

馨香巖 蛟涎漬頑石磴道何崎嶇深潭湛古色興雲
只須臾

釣臺 地非七里灘名乃千古同神仙聊戲劇何有
一絲風

磔潭 山川萬古秘雲雨一潭幽何日卧龍起碧潭
空自秋

三山石 三山豈仙居百世真道學荒臺明月秋懷哉
彼先覺

五面石 奇石不為峯何用作五面獨立賞春暉水流
花片片

小隱巖 抽矢射白額歸洞讀舊書小隱不可見後來
誰卜居

一線天 青天何蕩蕩此中纔一線大道本來明慎勿

安所見

東平王繼學

士熙
朱文

龍口巖

晴瀑欹飛沫曉雲噓空青我欲探頷珠第恐

龍睡醒

洗藥池

仙苗濯靈根幽池發神光至今池中水猶作

芝朮香

丹井

丹成人已仙有井在崖竇如何葛稚川萬里

覓勾漏

長廊巖
修廊深石室香煙曳晴虹步虛聲欲斷行道

猶未窮

金沙嶺
佛將金布地仙以金為嶺笑殺塵世人愛金

如愛命

昇仙臺
真仙妙神化平地可飛昇喝石為此臺將以

遺雲仍

逍遙巖
萬物皆自適詎獨鷗與鵬何事巖下叟愛讀

南華經

靈湫 巖阿泓水淺無龍
曷為靈老君道猶龍占此
一勺清

寒月泉 湛如規玉瑩冷若清水冽
汲來試酌之乃是
一片月

玉簾泉 山月明銀鈎煙蘿垂帶綠
何人啟巖扃挂此
一簾玉

長生池 鑿池不為口游鱗樂其天
豈無赤鯁公飛駕
琴高仙

道人巖

道人昔修道鍊形巖穴中道成人已去白雲

鎖青松

雷公巖

帝遣雷公來為民作年豐天矯巖下羊孰云

非雨工

石人峯

壁立千仞岡不與世俯仰憑誰喚元章來此

拜石丈

學堂巖

天人無愚懵讀書乃真仙學堂在巖谷此道

今誰傳

老人峯 老仙欲飛騰
龍鍾恨無翼
笙鶴等不來
化作峯頭石

月巖 誰將修月斧
斷此石一彎
為報折桂人
蟾宮在人間

鳳山 秋風吹竹實
朝陽照梧樹
定有吹簫人
來此山中住

仙足巖 飫聞神仙名
不見神仙形
何年伸一足
蹈在幽巖局

鬼谷巖 鬼谷久為鬼蒼厓名不磨咄哉千載下儀秦
一何多

風洞 白羽無用搖披襟坐空明不聞萬籟響但覺
兩腋清

釣洞 桐江一絲風萬古蜚英聲築臺學嚴子道人
不求名

磔潭 澄淵窈深碧波光射琳宮時有聽經叟恐是
潭中龍

馨香巖 巖洞深水府貝闕接幽靈腥霧襲人鼻時作
龍涎馨

三山石 蓬瀛孰云遠神仙在人間中有列仙像白日
生羽翰

五面石 一石俱五面吐納五方氣遙看石上雲時現
五色瑞

小隱巖 陵藪未為僻巖穴入深窈山村總市廛茲隱
孰云小

一線天 巖上天萬里巖下天一線慎勿謂天小有眼
看不見 金華王奎景文甫

龍口巖 噓氣雲修修噴薄雨輕注手擘蒼壁開斬然
頭角露

洗藥池 長鑱斲靈根濯以上池水餘波濕黃精不洗
俗子耳

鍊丹井 金月淪井底千載水渾赤短綆願汲深三嚙
生羽翼

長廊巖 虛牕開修廊回風走落葉
夜月照無眠披衣來步月

金沙嶺 築塢真憊藏披沙亦良苦
小嶺隔仙家黃金賤如土

飛仙臺 棄世如脫屣竦身即蓬萊
臺空白雲滿笙鶴時歸來

雷公巖 微陽地中復一鼓元氣行
驚起懶龍蟄母作嬰兒聲

石人峯 振衣陟高岡
質化日已遠
天荒地維折
獨立
心不轉

學堂巖 邃然若厦屋
中隱列仙居
常聞伊吾語
不讀
人間書

老人峯 細草宵垂鬚
積雪髮飄素
相逢或疑年
甲子
不知數

月巖 四萬八千戶
斲此寶月圓
剛風大地動
明鏡
驅上天

鳳山何年覽輝下借此松桂按春風一振羽百鳥
不敢啼

逍遙巖並木以為廬片石以為席朗誦逍遙遊小大
各自適

靈湫坎井蔽荆棘居然閤神靈願借一勺水為霖
慰蒼生

寒月泉清如三危露冷若太古雪舉瓢斟酌之一洗
五情熱

玉簾泉

仙家金銀闕低垂白玉簾天風忽卷起玕瑤

鳴纖纖

長生池

靈龜或千歲游魚亦有神會此菊潭水盡壽

南陽人

道人巖

道人仙去久道人名尚存樵青相雄長竭來

欲爭墩

仙足巖

仙人本空飛可望不可即誰能及踵武徒爾

沉形跡

鬼谷巖 清溪絕氛垢靈風滿巖扉空餘山水壽三歎
游仙詩

風洞 山開空洞腹百竅時一噫獨坐碧窗寒洗耳

聽天籟

釣臺 危石可箕踞投竿俯深清寄語羊裘子釣魚

非釣名

磔潭 潭色深黝黑無底通歸虛安得然犀照下燭

鮫人居

馨香巖 巖谷下空歆潭底正深黑心清香自聞龍坎
在盤石

三山石 三山擁黌宮濟濟衿佩列但使本心明神僊
不留訣

五面石 削成元氣中屹立高岸律五面雖不同貞堅
心若一

小隱巖 朝市亦可隱上界官府多濯足澗水下晞髮
陽之阿

一線天 坐井祇見小一線難求通蒼蒼覆九有無人
為發蒙 括蒼林傳以道

子昂諸賢賦天冠山五言詩二十八首模寫已盡矣予
遂作唐律一章題卷尾云 閒閒道人吳全節 青山
特地聳天冠聞說羣仙駕紫鸞浮世黃金空白髮倚雲
蒼玉尚玄壇松根怪石千年化檜頂飛泉六月寒宏景定
辭神武去鷗波浩蕩錦江干 天曆二年六月十有一
日雨中書

龍口巖

日落露光吸春深雨沫飛昂藏無蟄相吐納

有仙機

洗藥池

好在池中水誰留海上方至今人搗處千載

有餘香

丹井

千年井水赤人道有遺丹姹女顏何在飛仙

骨已寒

玉簾泉

泉飛到地垂借問卷何時昨夜崑岡火仙關

渾不知

長廊巖 洞府廊千步苔封不盡春
升堂并入室今古豈無人

金沙嶺 此嶺入仙家金星射日華
極知同糞土何用化丹砂

飛昇臺 石湧數層臺高人去不迴
肉身無羽翼誰復是仙才

逍遙巖 欲識逍遙處茲泓隘九州
一巖能幾許空有此名留

靈湫

山靈守此定雲霧起時時人道蓬萊淺龍歸

人不知

寒月巖

寒月至泉底酌泉和月吞秋光水人齒胃次

幾乾坤

長生池

吞嚙華池水仙傳不死方此池名美耳人壽

若為長

道人巖

道人何許人巖冷耿餘情人已無形影如何

問姓名

雷公巖 巖裏有雷公巖前劈怪松寥寥天宇大萬壑
幾秋冬

老人峯 神散形不化癡頑一老翁仙人鍊石髓何日
為還童

月 巖 老兔得仙藥依巖晝夜明可憐天上者不似
我長生

仙足巖 石上巨人迹傳聞古亦然巖今露一足邴不
是飛仙

鬼谷巖 巖是仙人宅猶存鬼谷名黃冠如此衆誰解
說縱橫

風洞 日日洞門開清風洞裏來天生仙鏡界不許
有塵埃

石人峯 塊石立巖扃頑然不復靈空令千載下猶說
是仙形

學堂巖 道侶作非像巖居恐腹虛仙經人不識當是
讀何書

鳳山 何年來覽德疑此類岐周綵羽今誰見山名

自爾留

馨香巖 是此斬蛟地腥風冷幾年空巖香氣滿定有

水中仙

釣臺 臨水臺千尺人家不姓嚴今無釣鰲手贏得

老龍潛

磔潭 磔高開洞府此宅有龍君不盡池中水須容

世上分

三山石 三片山根石侵雲品字排時時會孔老東觀

復西齋

五面石 統體一太極居然五氣分無由知艮背面面

自生雲

小隱巖 仙人不可見來往太虛空瑣瑣巖居者何由

與爾同

一線天 巖高天破碎一線不堪紉莫道女媧死彌縫

自有人

元統乙亥余自洪校文還吾宗丹陽師出示天冠山二
十八詠皆朝貴手筆余何敢下注脚然以宗誼重師請
不能辭它日見者必曰何物小子敢污此卷則知罪矣
祝堯

龍口巖 何年鑿山骨雙闕鬱崢嶸行人不敢近中有
風雨聲

洗藥池 仙家種瑤草養之日月華藥池流水出世上
得胡麻

丹井羽人千載去丹去春泉肥何如未央宮銀牀
生夕霏

玉簾泉泉影懸玉簾瀑布界青壁神君騎黃鶴隱士
歌白石

長廊巖長廊不可居四時嵐氣寒別有如堂者好作
玄都壇

金沙嶺金沙生嶺頭仙子鳬鳥穩空谷無足音高人
樂真隱

飛昇臺 步上昇仙臺飄然隔萬塵天低星辰近雲氣
常逼人

逍遙巖 朝看碧桃花夕譜洞簫曲大年駐清景逍遙
本無欲

靈湫 山中有靈湫古來是龍宅墮月沈流光出雲
透深碧

寒月泉 洞天在眼中石竇消古雪自有松桂林因之
煮寒月

長生池

日月馳兩轂催逼世人老養息長生池千歲

童顏好

道人巖

石巖有仙居終古與石存千年穀城山寂寂

誰與論

雷公巖

雷公不上天收聲息巖戶龜田嘉禾死為起

作霖雨

老人巖

嫋嫋烟霧質宛宛星宿精千歲白髮青誰呼

老人名

月巖 嫦娥老不嫁獨在冰雪宮何年入山中素影
滿江東

仙足巖 仙迹本無踪凌雲逐黃鵠忽見山中人來言
有靈躅

鬼谷巖 日照神清洞雪封鬼谷巖古仙無姓氏櫛葉
剪春衫

風洞 洞口風泠泠日吹松桂寒泉聲夜相和環珮

玉珊珊

石人峯 高峯似石人天丁斧刀削不見宣和年千秋

倚雲幄

學堂巖 仙骨出靈胎邈與文字謝如何學堂巖囊螢

照中夜

鳳山 文鳥出丹穴飛下青琅玕永謝秦王女長依

舜樂官

馨香巖 種花弱水西斬龍赤岬東夜風吹天香何似

博山銅

釣臺六鰲戴神山仙宅白玉樓釣客坐空臺此物不可求

磔潭寒潭積重泉下有神物棲高秋吹木葉不敢下漣漪

三山石三山在何處迢遞大江東不得丹經訣欲訪浮邱公

小隱巖牛下有歌詩丘中有鳴琴歎彼考槃人千載誰知心

五面石 三山水清淺五面石檀欒苔磴綠蘿合花房
映竹盤

一線天 日車馳九萬天影積一線品彙涵太虛何如
管中見 柏臺馬伯庸父

龍口巖 呼吸通元氣飛潛順化機風雷生倏忽造物
豈兒嬉

洗藥池 采藥白雲裏洗藥清池中池水尚香潔仙人
已乘空

丹井鑿石通泉脉鑄鼎鍊丹砂丹成騎鶴去滿地
生雲霞

玉簾泉燦爛金為屋玲瓏玉作簾百泉來百道定有
老龍潛

長廊巖磬聲遠搖曳鎗影明參差洞章歌已徹行道
尚委蛇

金沙嶺緩步長廊巖更上金沙嶺慎勿貴金沙忘却
昇仙境

昇仙臺

黃鶴去不返白雲還自飛神仙豈無有何事

蹈危機

逍遙巖

鵬搏九萬里離鷄飛咫尺所以達觀人亦各

適其適

靈湫

白雲縹緲起驟雨頃刻來神龍一奮迅為農

甦旱災

寒月泉

啣水漱齒頰嚙雪滌胃腸此泉若寒月飲之

年命長

長生池 滄波幾清淺此水淨無滓應有得仙人洗髓
伐毛去

道人巖 巖花自開落山鳥時來去道人息深深凡聖
難窺覷

雷公巖 隱陽一面薄蕭翹皆奮飛安知聲原氣蓄此
甚細微

老人峯 雪披素髮短雲覆錦衣長遠近瞻南極高峰
有景光

月巖
空巖何圓圓老樹亦纚纚
天光雲影中明月
忽在指

仙足巖
神仙已霞舉誰復繼
其躅安知蓬萊山在此
不移足

鬼谷巖
昔有鬼谷子術知亦多奇
遂令後世士靡靡
競趨時

風洞
天地本空洞運化無停機
泠然萬竅作起自
一噓歔

石人峯 臨風衣自整對月影偏長獨立經寒暑真成
石作腸

學堂巖 萬象自森列千載瞬息間仙家學無為心境
乃清閒

鳳山 鳳有五色瑞千載一來翔往者不可見相期
白雲鄉

馨香巖 月中古桂根巖阿種來久秋風昨夜生馥馥
透窻牖

釣臺 高臺垂釣人應是經綸手尚父與嚴陵邂逅
豈無有

磔潭 澄潭湛無底俯觀毛髮寒但見龜魚出焉知
龍下蟠

三山石 海上三神山可望不可到即此是三山可與
論至道

五面石 何年星墮天化作五面石面面不相看相看
還是一

小隱巖 山深人寂寂 澗曲水沄沄 顧爾非忘世 遺身在白雲

一線天 蒼蒼倘飛天 天竟何形似 莫於通塞中 見此一綫止 京兆杜清碧本

子昂行書詩詞

白髮思家萬里回 小軒臨水為花開 故應動作詩千首 知是風流楚客才

雲淡風輕傍花隨柳 將謂少年行樂齋閣林間小車城

裏千古太平西洛瞻彼泱泱言思君子流水儼然如昨
但清遊天際輕輕未辨暮愁離索長記得童冠相隨浴
沂風舞吟詠鳶飛魚躍逝者如斯吾衰甚矣調理自存
斟酌清廟朱絲舊堂金石隱几似聞更作農人告有事
西疇窈窕掛書牛角 右調雨中花

北隴耕雲南溪釣月此是野人生計山鳥能歌江花解
笑無限乾坤生意看畫歸來挑燈閒眺風景又還光霽
笑人生奔走如狂萬事不如沈醉細看來聚蟻功名戰

金
卷九
蝸事業畢竟又成何濟有分山林無心鐘鼎誓與漁樵
深契石上酒醒山間茶熟別是水雲風味順吾生素位
而行造化任他兒戲 右調雨中花

昏曉相催百年窓暗窓明裏人生能幾贏得貂裘敝富
貴浮雲休戀青綾被歸與未放懷煙水不受風塵昧

右調點絳脣 子昂漫書

松雪翁雜書八則真蹟 每則有款

來多去多枉受奔波來少去少省些煩惱

一菜一魚一茶一飯客亦可來主亦可辦

道士桑芝田求善之先生書盤谷叙復求僕書歸來辭
惜無蜀中冷金紙對之俟有此紙別為寫過

偶畫得大士像一紙甚有圓滿慈悲之意用作林下布
施也孟頫書致習公侍者

昔徐信之製筆得名皆由出入叔父尚書門下日令縛
一枝不如意輒使拆去細究其工所以得名今人能若
是乎可為太息至大二年正月十日子昂志

昨日無錫一道友封寄惠泉即命童試新茗果是味別
明日當分送何山鐵鏡老看他舌端有眼否

余與息齋道人同寓都城張氏林園日以繪事相講訂
信非人間之樂也不見十年政如隔世可嘆可嘆今日
其家僮迴維揚就問道入與竹平安否至大四年二月
二日戲書此閒帑時高士石可友在坐子昂友人年成
甫之貧香巖所謂錐也無者豐年猶啼饑況此荒歉將
何以果其腹而贍其老穉淵明乞食魯公乞米賴多古

賢可為口實仁人義士有能指魯肅之困而實萊蕪之
甑者乎 吳興趙孟頫白

趙集賢南谷二帖

孟頫頓首拜覆南谷真人尊師靜侍孟頫頃到殊勝甚
擬得遂晤言然竟成交臂而失至今以為恨舊年廿六
日還舍除夜來德清新歲二日忽路家遣吏見請三日
急迴城中乃蒙隆福有書經之召今日至德清別墅明
日即過杭詣省中計事數日間即走都下區區情事吾

師所深悉政猷卜築溪上以為終老之計而情願未遂
極令人徬徨兼居行乏力尤所甚憂感尊師欲寫石壁
間大字冀遣人至杭見教所書之文便當寫納但行役
擾擾似不能一詣侍下以此為恨大不可言承惠條至
以為感所惠書著園人附航寄往城中乃成墨池敬勒
手狀陳叙情素臨紙不勝馳神此行度已不能免然尊
師有見教者是勿惜至意乃所望也餘冀萬萬珍重不
備人日弟子趙孟頫稽首再拜林師來侍冀道意拙藁

至今抄未成當令家下寄去也

孟頫稽首再拜南國真人尊師侍者數日來苦腹疾不
果詣前問候不勝馳仰茲被誨帖惠以新冠領次感激
無喻叔實不幸長逝昨日聞之為之痛傷聊以十兩奉
之冀為轉達今晚還吳興不能詣別惟善保道體不宣
孟頫再拜

趙榮祿簡覺軒路教諸蹟

孟頫連日甚欲一詣行館共談而人事絆之意未能去

知罪知罪昨日蒙惠帖下徵惡札併前者同此奉納但竹石帑狹不可作且寫四詩續當為公作竹石也今日又有少事明旦僭屈台重過此一飯切告勿阻至扣至扣遲言叙不宣

孟頫近獲晤言甚慰數年契濶之懷方欲奉陪尚羊湖山間而微恙乃能阻之茲承惠字則知仙舟已解纜矣瞻望悵然惠及沙闕不至舊愛否秋氣著人途中厚自愛不宣

孟頫一節疎於上記遙想樓居仙人眺八極而自得唯
有仰企而已人來得所惠書就審即日履候勝常為慰
千萬承諭以令郎文書已一如來意見之行移旦夕當
奉納也遠惠圓米細茶深仍厚意祇領感激無已草草
具復寒燠朝暮莫惟善保不宣

孟頫久別傾渴無喻伏承惠書審文旆至止不勝欣慰
蒙惠白米鵝麪茶果深見盛意祇領感戢無已台體所
苦小爾今服何藥專當詣使寓拜問併陳謝私也草草

具復不宣

孟頫得旨暫還直以家事冗擾未能奉狀計唯即日文
候勝常孟頫本為先人墓石未立所以觸熱來歸而石
尚未得至殊焦煩耳湖州前錄事宜差今還宜興稅務
提領在此為政甚平與弊家甚親今在貴里望吾兄照
覩幸幸因便奉記草草唯加察餘莫善護不宣

孟頫奉別甚久馳仰殊深去夏得旨南還日困塵事不
得上記問候惟切傾企而已行次毗陵承專人惠書就

審即日文候勝常慰不可言且蒙過愛特貽厚贐拜領
豈勝感激舟中草草具答漸遠惟慎護興息不宣

紈扇一握拜納付至李尚書墨竹即如來戒各題小詩
其上甚愧塵浣畫軸極用惶恐惶恐望日謹空

右趙榮祿與覺軒先生手簡共六帋有以知交誼之
深家世之舊也先生學行純正為宋瑯琊王字仲寶
之後仕至蘭溪州判官今獲觀於其孫光大之彞齊
老成典型不可復見矣尚賴翰墨文章有以見其風

流哉 至正二十年歲在庚子二月望日倪瓚謹題
余聞荆溪有覺軒王先生繇文學起家至蘭溪州判
官生晚不及識聞之四十年見其孫光大出松雪與
先生手筆凡六帑內謂樓居仙人跳入極而自得者
真可企仰光大乞書楮尾於是乎書 至正乙巳冬
十月二十有四日會稽抱遺叟楊禎在卷素齋試沈
先生樂墨

義興舊閥之家得松雪翁者元初唯王氏岳氏兩家

而已治生唐門幼學之時尚多見之到今五十年來
訖無片紙存者而岳氏之後蓋亦寂寥無聞焉今觀
囊齋所藏六帖皆翁與其先大父往還書紙墨尚新
則知王氏子孫之賢視它族所守厥有間哉因感而
識之 壬戌歲九月二十又二日為立冬日馬治

子昂答子誠劄

孟頫頓首再拜知州相公子誠閣下孟頫去歲騎從來
吳興因得畧吐久別之懷所恨貧家無可將接坐來簡

慢知我最深必不見咎別後賤體老病交侵藥裏不離
左右者一年于茲獨坐空齋憤悶無聊子誠聞之必能
見原耳他人前不欲道也茲承專价惠書就審履候勝
常深以為慰承喻三皇廟碑及光福碑銘托愛如此其
敢不書但恐筆墨蕪穢不堪上石耳漫爾書付去人更
在裁之外蒙潤筆之贈子誠何必爾耶不敢引辭領次
惶愧之極草草具瞻餘唯上為國家下為吏民慎謹興
息不宣孟頫頓首再拜五月十九日

李西涯跋趙文敏行書坡僊烟江疊嶂卷

松雪大書見者絕少東吳王敬之氏有此其永寶之
正德十五年十一月十一日李東陽書 正德戊辰
春三月二十日衡山文壁觀槐兩先生所藏松雪書
為補此圖

趙子昂書陶詩

陸宅之文 楊
眉菴徐武功跋

少無適俗韻 一首 孟頫書似明遠老兄

古者書志凡嘉言善行聞見必錄故經傳皆曰志莫

非修齊平治不徒夸多識資譚柄是尚其不經者若
齊諧志怪之類反以資惑聖人無取後世無傳焉魏
晉而下其膾炙人口如世說者亦純駁相半務博者
多資之然去經傳遠矣近世惟宋代特盛客譚筆錄
何啻數百家若近思典刑敦倫諸錄雖未敢儕諸經
傳然敦倫美俗亦足為風化助彼夷堅酉陽無稽浮
誕適足蠱愚導姦則又甚於齊諧者以是觀之志錄
可苟作乎宗人景周博學好古聞善必錄皆使言者

自書其事大率皆當代賢士大夫嘉言善行將以為
循省資志亦善矣然善可法惡可戒與否則在客之
見與景周之自擇至正甲辰立夏日雲間陸居仁在
千山環翠樓書

松江陸蒙者家富而好禮收蓄古書畫彝器甚多一
皆名人無不獲交有友聞錄者楊廉夫陸宅之皆為
之序余亦嘗書數詩與之蒙既死家破於兵此文流
傳竟歸於余前松雪書亦其家故物因合作一軸異

時當訪其子孫有識者還之時洪武四年七月十一日吳門楊基孟載記

趙魏公書于規矩之中自有神仙蛻骨風度楊鐵崖狂怪不經而步履自高陸宅之學藏真而自出機局三公雖高下不同然皆能以其文章翰墨豪於一時陸景同不知何人乃能筆而得之留落之餘復為吾鄉楊先生所輯觀其題識宛然忠厚可掬皆足重也元聖高士寶此卷數年矣間出相示因評數語如右

東海徐有貞

功武

崇禎癸未重九日寒山趙子惠來吾未訪女史黃皆
令携其先凡夫所遺物欲售余因得觀此卷并衡山
手錄甫田全集李北海墨蹟宋元人畫及古澄泥研
作陰陽對扇開合宋做白玉飛鸞楊萱彩描漆囊魚
耳宣鑪種種又子惠近作云盛夏非闕逼歲除凱風
偏不借吹噓抽毫那有生花筆展卷寧無蠹字魚妝
束有懷人杳渺榮枯不定任親疎斷雲孤月魂無倚

荏苒年華獨掩居
款題扶風馬昭從夫姓也詩與字
不下其先陸卿子至寫生逼真其母氏文淑也惜不
免去婦嘆耳噫佳人薄命自古為然矣

樂卿
筆記

鮮于奉常書詞子

青天無數白天無數綠水遶灣無數
灞陵橋上望西川
動不動八千里路
來時春暮去時秋暮歸去又還春
暮人生七十古來稀
好相看能得幾度
漁陽困學書


又草書唐絕真蹟

單條

新妝宜面下朱樓
深鎖春光一段愁
行到中庭數花朶
蜻蜓飛上玉搔頭

玄晏先生好著書
懶心久與市朝疎
君看黃鵠闐闐去
閒羨羣鷗戀鼠餘
伯機

後絕兒淵以若為余設者
因雙釣於高麗帟置諸屏
間云
秀水脈望生識小
西石倉間



珊瑚網卷九